

大乘阿毗達磨雜集論述記卷第十四

唐京兆大慈恩寺沙門窺基撰

云何見所斷幾是見所斷爲何義故觀見所斷耶。謂分別所起染汙見疑見處疑處及於見等所起邪行煩惱隨煩惱及見等所發身語意業并一切惡趣等蘊界處是見所斷義。此中分別所起染汙見疑者謂聞不正法等爲先所起五見等分別所起言爲簡俱生薩迦耶見及邊執見問何相邊執見是俱生耶。答謂斷見已學現觀者起如是怖今者我我爲何所在見處者謂諸見相應共有法及彼種子疑處亦爾於

見等所起邪行煩惱隨煩惱者。謂依見等門及緣見等所起貪等。

依見緣見者。依見謂爲同類因等生。

一切一分是見所斷。一分者。除修所斷及無漏故。爲捨執著見圓滿。我故觀察見所斷。

見圓滿我者。先云見。謂見道圓滿。謂所斷具攝十八界等。故名圓滿。彼皆計見所斷爲圓滿。我故今解執我能見本理圓滿。今其要無漏見斷見所斷方見圓滿。非我也。

云何修所斷。幾是修所斷。爲何義。故觀修所斷耶。謂

得見道後見所斷相違諸有漏法。是修所斷義。見所斷相違者。謂除分別所起染汙見等。餘有漏法。有漏法言。亦攝隨順決擇分善麤重所隨故。一切一分是修所斷。一分者。除見所斷及無漏法。爲捨執著修圓滿。我故觀察修所斷。云何非所斷。幾是非所斷。爲何義。故觀非所斷耶。謂諸無漏法。除決擇分善。是非所斷。無漏法者。謂出世聖道及後所得并無爲法。十界四處諸蘊。一分是非所斷。問。何等色聲是非所斷。答。無學身中善身語業自性。是非所斷。爲捨執著成滿。我故觀察非所斷。

見斷等義略以四門分別。一出所斷體。二辨所斷義。三顯所斷位。四問答分別。所斷體者。謂有漏法。通色非色所有業果。非色有七位。一心。二徧行。三別境。四善。五根本煩惱。六隨煩惱。七不定。其諸假法。見修所斷。如實法說。於非色中。初之三位。隨與此相應。卽說此所斷及非所斷。根本煩惱中。三見及疑。唯見所斷。分別起故。於邊見中有義常見。唯見所斷。對法第四瑜伽八十八唯說。斷見修所斷。故有義亦通修所斷。顯揚一大論八說。常見斷見。皆通分別及俱生故。餘貪等五通見修斷。依見緣

見緣事生故。隨煩惱中無慚等十通見修斷。能通不善染汙心故。忿等前十有義唯修斷。唯緣事生不迷理故。有義皆通見修所斷。五十八說嫉無漏。故對法第三亦云。嗔恚嫉出離故。諸外道等緣見依見亦有能生忿慳等故。睡眠尋伺通見修斷。惡作有義唯修所斷。緣事生故。有義亦通見道所斷。亦依見等悔善等故。其餘諸法唯修所斷及非所斷。五十七說信等五根通修所斷及不斷故。六十說善及無記修所斷故。此如唯識第六第七卷說。善等有義亦見所斷。對法第四說惡趣一切蘊

界處等見所斷故。唯識論第八卷說若緣縛斷說善等法唯修所斷依不生斷無想定等說見所斷由此傳釋諸三惡趣別報善法此業及果是見所斷。前染汙法所發諸業及所得果若色若心見所斷發所得果者。此見所斷修所斷發及所得果皆修所斷。如對法第四等說。諸非所斷略有二例。一非縛謂諸無漏有爲無爲。對法第四說唯諸無漏非所斷攝。二已畢竟斷名非所斷。六十六說無學身中善無記法名非所斷。此總第一出所斷體。二辨所斷義者。略有二位。一自性斷謂諸染法通見

修斷。二離縛斷。此有二種。一離縛斷謂斷緣彼雜彼煩惱。六十六說善無記法唯修所斷。二不生斷。此有二種。一因滅果不生謂三惡趣果見道所斷。二果衰因不生謂諸善法見道所斷。五十三說於見道中無想異熟能得畢竟非擇滅性。故因亦斷如是類也。諸非所斷二類如前出體中說。此卽第二辨所斷義。如唯識緣生中釋。其惡趣果斷二種。一云體亦隨無見道障故。論云無記修所斷者據餘無記雜緣縛說。一云唯斷業有無記不除。不能生異熟。云何釋異熟障據此果無記體在生雜緣

縛三顯所斷位者。見斷修斷有義。因果俱一刹那。無閒道生一時頓斷。如圓鏡智無閒道生。此師意說。一心見道無閒道生。此時頓斷諸業煩惱及果。若三心見道。二無閒道時。亦因果俱斷。解脫道時。唯能證理。有義惑業無閒道生。即便已斷其所感果。無閒道俱解脫道生。其果方斷。如圓鏡智解脫道生。若於修道不斷果位。二障種子無閒道斷。二障麤重無閒俱解脫道生。麤重方斷。是爲無閒解脫差別。如唯識第九第十說。四問答分別。問。能斷所斷同時異時。答。非同非異。猶如明闇及稱兩頭。

高時下時。平等平等。問。爲斷現在爲過未耶。答。非斷三世。仍從三世而說於斷。未來未生故。過去已謝。現在不住故。然如明闇。斷彼惑時。三世不轉說斷三世。此上諸門。如五十九及論說。頗有斷彼種子不斷麤重耶。應作四句。有先斷種子不斷麤重。謂二乘者。斷煩惱種不斷彼麤重。不得名爲永斷習氣。如五十九說。有斷彼麤重不斷種子。謂十地菩薩。斷彼俱生煩惱麤重不斷彼種。有亦斷麤重如見道究竟道斷二障種子及與麤重。十地菩薩所知障種及與麤重俱時頓斷。此上二句如解深。

密第七十八唯識第九卷說。有不斷種子。亦非麤重。謂世閒道。唯伏現行。不能永斷。種麤重故。處處經論。并有此文。頗有先斷煩惱障。不斷所知障耶。應作四句。第一句。謂二乘者。第二句。十地菩薩。第三句。見道究竟道。二種菩薩。第四句。謂異生。頗有生在地下。斷上煩惱耶。應作四句。第一句。者。謂生地下。斷上地煩惱。得諸聖果。第二句。謂生上地。得無學。斷下末那俱生惑故。第三句。者。如理應知。第四句。謂異生。隨生上下。唯伏現行。不斷種故。如唯識二障中說。見斷等中。楞伽有二身見。十地經論

第四地身見爲首。大智度論第五十云。七地菩薩轉煩惱者。菩薩以福德持戒力故。折伏麤煩惱。安穩行道。唯有愛見慢等微細者。今亦離細煩惱。此論言七地離見。是何見耶。

云何緣生。幾是緣生。爲何義。故觀緣生耶。謂相故。分別支。故略攝支。故建立支。緣故。建立支業。故支雜染攝。故義故甚深。故差別。故順逆。故是緣生義。

緣者。謂以爲境。三種緣生。謂自性愛非愛受用三種。四緣生。謂相續剎那。連縛分段。諸內情法。無始不斷名相續。一剎那中具十二。癡爲無明。思爲行。

心爲識。餘爲名色。六根爲六處。觸數爲觸。受數爲受。貪爲愛。餘惑爲取。卽無慚等。身語業爲有。諸法起用名生。異相名老。無常爲死。內外情非情有無漏法。前滅後生相連縛故。名連縛。此體通有無漏。十二緣起三世異故。名分段。勘攝論。

相者。謂無作緣生故。無常緣生故。勢用緣生故。是緣生相。由此相故。薄伽梵說。此有故。彼有者。顯無作緣生。謂無明緣行乃至廣說。此有故。彼有者。顯無作緣生義。唯由有緣故。果法得有。非緣有實作用能生果法。此生故。彼生者。顯無常緣生義。非無生法爲因。故少

所生法而得成立。無明緣行等者。顯勢用緣生義。雖復諸法無作無常。然不隨一法爲緣。故一切果生。所以者何。以諸法功能差別故。如從無明力故。諸行得生。乃至生力故。得有老死。

一切外道執諸法有實作用。有實能生用。是相者。中有三故。第一破吠世師立諸法有實作用。卽有作用句。是第二句。破外道大自在天體實徧常能生諸法。餘亦復如是。非佛爲遮。當來大眾部等故作此說。大眾部化地部等立緣生是常。第三句。破一因生論。卽外道執一大自在天。有此三義。一者

有實能生作用。二者因常。三者一因生一切物。然緣起經亦有此三相。

分別支者。謂分別緣生爲十二分。由十二支緣起差別故。何等十二。謂無明行識名色六處觸受愛取有生及老死。略攝支者。謂前所分別無明等十二支。今復略攝爲四。謂能引支所引支。能生支所生支。

十地論亦有能引所引與瑜伽緣起經不同。如唯識論。

唯由如是四種支。故略攝一切因果生起法。盡謂於因時有能引所引於果時有能生所生。

謂於因時有能引所引於果時有能所生者。愛取有是因非果。以近能生生老死故。因從近果亦名爲果。十地經云。愛取有生老死。是見未來世事故。又解果者。熟義謂彼前業等種。今爲愛等所潤。將熟得果。故約正熟皆名爲果。

能引支者。謂無明行識爲起未來生故。於諸諦境無智爲先。造諸行業熏習在心故。

於諸諦境無智爲先者。顯四諦下不共無明皆能發業。雖無明行相唯有二。謂異熟真實義。然迷四諦總別皆得。

所引支者謂名色六處觸受。由心習氣力能令當來名色等前後相依次第生起種子得增長故。能生支者謂愛取有。由未永斷欲等愛力於欲等中愛樂妙行惡行差別爲先發起貪欲。

未永斷欲等愛力卽因力。謂於欲見戒我語四之愛起四境界。於欲等中卽境界力。愛樂等者卽作意力。此釋愛支。

以有有取識故。於命終位將與異熟隨順貪欲。隨一業習氣現前有故。

以有有取識者。彼云以有者謂生支等後有。第二

有字謂有支業。取識者明取支相應識。明取支相應潤業支有取於後有生支等報故。故下文云取有二業。一爲取後有。令諸有情發有取識。此釋取支隨順貪欲下解有支。今解以有者有無之有也。第二有者當果有也。取識者謂業行種。此論說爲識支以有彼取當有之業識。故於命終位將與異熟等也。次言取支相應識有何意也。或初有有無之有。次有謂有支。此能取當來識支。故名有取識。發起貪欲卽通愛取二故。故云隨順貪欲。不爾應言隨順於取。何故乃言隨順貪也。

所生支者謂生老死。由如是業差別習氣現前有故。隨於一趣一生等差別眾同分中如先所引名色等異熟生起故。生老死言爲顯依三有爲相故。

顯依三有爲相者以三相名顯此下支。以欲顯依三相緣起經中顯三苦故。離老病死等如唯識解。所以老死合立一支者爲顯離老得有死故。非於胎生身中離名色等得有六處等法是故於彼各別立支。

非於胎生身中等者。化生頓起應六處俱然可後別。胎生必不爾故。徧簡之。其溼生卵生亦復如是。

建立支緣者謂習氣故引發故。思惟故俱有故。建立支緣隨其所應。依四緣相建立支緣。且如無明望行前生習氣故得爲因緣。由彼熏習相續所生諸業能造後有故。當於爾時現行無明能引發故爲等無間緣。由彼引發差別諸行流轉相續生故。思惟彼故爲所緣緣。以計最勝等不如理思惟緣愚癡位爲境界故。彼俱有故爲增上緣。由彼增上力令相應思顛倒緣境而造作故。如是一切隨其所應盡當知。建立支業者謂無明支有二種業。一令諸有情於有愚癡二與行作緣。令諸有情於有愚癡者謂由彼所覆於前

中後際不如實知故。由此因緣起如是疑我於過去世爲有爲無如是等。

業中十地論者應一一配乃至引婆沙瑜伽一一支中釋妨難。無明業中起如是疑我於過去爲有爲無卽十九無明。如瑜伽第九謂前際後際前後際內外內外業異熟業異熟佛法僧四諦因及所生行并於六觸處如是無知其前際中有四謂我於過去若曾有爲非有耶曾何體性曾何種類今舉有無等餘二前十八無知。

與行作緣者由彼勢力令後有業得增長故。

緣起經內法異生不放逸者所有福及不動行非無明爲緣。瑜伽說無明通發三業有三會一云內法異生不放逸者卽解脫決擇不感總報非四見道無明所發唯修道無明發唯感別報故四無明唯見故二解緣起經以有覆無記信所攝伏發非不善四無明發據實有覆發亦感總報三云有不善位識在唯無不共相應二種非無種子多分位無支發爲別餘異生所以不說非無隨眠發總報行有二種業一令諸有情於諸趣中種種差別二與識作緣令諸有情於趣差別者由業勢力令諸有情

趣種種異趣故與識作緣者。由習氣力能使當來名色等生起種子得增長故。識有二種業。一持諸有情所有業縛。二與名色作緣。持諸有情業縛者。與行所引習氣俱生滅故。與名色作緣者。由識入母胎名色得增長故。名色有二種業。一攝諸有情自體。二與六處作緣。攝有情自體者。由彼生已得預有情眾同分差別數故。與六處爲緣者。由名色等前支爲依止六處等後支得生起故。

名色二業攝有情自體卽爲入母胎於識之業復說識入母胎何故說二俱入母胎。今有二解。一識

支據實入母胎。言名色入胎者。前說識爲業種故。又解。識支一七日未有形量相貌未爲有情自體。一七日後有相故名有情體。非爲入胎不相違也。又識依現在現行識能持業習氣故。卽是過去業所感識說名色。依是由業入母胎說。唯識云依現在說識等五當來說生老死。

六處有二種業。一攝諸有情自體圓滿。二與觸作緣。攝諸有情體圓滿者。由彼生已餘根無缺故。觸有二種業。一令諸有情於所受境界流轉。二與受作緣。令有情於境流轉者。依此爲門受用順樂受等三種

境界故。受有二種業。一令諸有情於所受用生果流轉。二與愛作緣。令有情於受用生果流轉者。由此爲依受用種種可愛等業異熟故。與愛爲緣者。希求與此和合等爲門。諸愛生故。愛有二種業。一引諸有情流轉生死。二與取作緣。引諸有情流轉生死者。由彼勢力生死流轉無斷絕故。與取作緣者。愛味求欲爲門。於欲等中貪欲轉故。取有二種業。一爲取後有令諸有情發有取識。二與有作緣。爲取後有發有取識者。爲那落迦趣等差別。後有相續不斷。令業習氣得決定故。與有作緣者。由此勢力諸行習氣得轉變故。

發有取識者。彼云。發於有支取識。謂取支同時識。明地獄等五趣差別。令後有不斷。釋上爲取後有。令有支業習氣得決定果釋上。發有取識。亦可取識者。由取支發有業。令未來識支得現前。故名取識。由此取支潤業力故。諸行支習氣。旣爲取潤轉成有支。故言轉變。或取者漏義。卽有漏業。業卽識故。發有漏之業。此同上解。

有有二種業。一令諸有情後有現前。二與生作緣。令後有現前者。能引無間餘趣故。與生作緣者。由此勢力餘眾同分轉故。生有二種業。一令諸有情名色六

處觸受次第生起。二與老死作緣。令名色等次第起者。能引後後位差別故。與老死作緣者。由有此生彼相續變壞皆得有故。老死有二種業。一數令有情時分變異壞少盛故。二數令有情壽命變異壞壽命故。支雜染攝者。若無明若愛若取是煩惱雜染所攝。若行若識若有是業雜染所攝。餘是生雜染所攝。問。何故識支業雜染攝耶。答。諸行習氣所顯故。

三雜染如唯識解。瑜伽九云。三煩惱。一是業。餘是苦作業。有說攝大乘等唯說三煩惱。唯識說行有一分業也。七有一分苦。今準此三文不同。以識業

通二故。

義者。謂無作者義。有因義。離有情義。依他起義。無作用義。無常義。有剎那義。因果相續不斷義。因果相似攝受義。因果差別義。因果決定義。是緣起義。謂離自在天等作者故。是無作者義。以無明等爲因故。是有因義。無自然我故。是離有情義。託眾緣生故。是依他起義。眾緣作用空故。是無作用義。以非恆故。是無常義。生時過已。無暫住故。是有剎那義。因剎那滅果剎那生時分等故。是因果相續不斷義。不從一切一切生故。是因果相似攝受義。從非一一類因非一一類

果生故。是因果差別義。於餘相續不受果故。是因果決定義。

義中有十一門。依提婆菩薩破外道論。此中第一是韋陀論師六師論中迦羅鳩駄外道計。彼立梵天能出生一切。與一切法爲因。梵天爲作者。論文解於彼云。大自在天等緣。故知一切皆立不平等。因皆在此中。第二破尼乾子。不須修因。見謂八萬劫自然解脫。第三破自然我。那邪修摩計。彼立我爲諸法因。第四破阿耆多見。彼諸法不從因得。自然而有。不從緣生。第五破勝論師。立我外別有作

用句。立諸法有實作用。

問此是何句。

第六破僧佉計。冥

性是常能與二十三諦爲因。第七破正量部。因果剎那長短。第八破上座生滅同世。或經部明異熟因果不同世。仍無去來。義釋果時無因。因時無果。難唯識第三卷。第九釋外道等四大生一切物。故云一切諸法互相生。難顯功能決定相似相生。故第十釋小乘等一因一身果等難。今顯多因於一身一類果生。如五無閒果。一身受。一因於多身多類果生。如生報等多身受。從初爲名。名生報業。一因生一果。多因業於多身之類果生。成四句義。準

此釋文卽便易解。第十一釋旣爾不定業應名何報等難。顯定生唯生定後唯後。若不定者可有轉義。初六破外道。次二破小乘。後三釋妨難。雖非無因作用等。非從一切一切果生。非從一因唯一果生。於餘相續亦不得受果論。是故如是說。卽瑜伽第十說。

義中十一門。初一破不平等因。第二破無因論。第三破我卽蘊相。第四第五顯有功能緣無作用緣。第六第七顯體無常非常住不同僧佉等。此二破常見。第八破斷見。因果不斷故。第九破因果互通。

生第十破諸一因唯一身受果計。第十一釋此一因多身受果妨難。準下甚深初復次解此爲五段。準下甚深中第二緣次難。四是此中五義破他餘類。此中第七第五第三第一。如下次配下四總顯有因。卽遮第二無因故。合爲五。餘之五門對破他。以顯自宗。通明緣起八門分爲二。初六明染法。後二明淨法。前六門又分三。初二唯內別總法。次二唯外別總報。後二內外二緣法。唯內別法。愛非愛內外通法故。瑜伽云。十二支攝識生愛非愛二各一分攝。內死生全餘不相攝。其清淨順無漏故不。

說。

甚深者。因甚深故相甚深。故生甚深。故住甚深。故轉甚深。故是甚深。義謂卽由此無作者等義。顯緣起法五種甚深。由二種義顯。因甚深對治不平等。因無因論故。由一種義顯。相甚深。是無我相故。由二種義顯。生甚深。雖從眾緣果法得生。然非彼所作故。由二種義顯。住甚深。實無安立。顯現似住故。由四種義顯。轉甚深。因果流轉難了知故。又諸緣起法。雖刹那滅而住可得。雖無作用。緣而有功能。緣可得。雖離有情而有情可得。雖無作者。而諸業果不壞可得。是故甚深。

業果不壞者。雖內無作者。而有作業受果異熟。又諸緣起法。不從自生。不從他生。不從共生。非不自作。他作。因生。是故甚深。不從自生者。謂一切法非自作。彼未生時。無自性故。不從他生者。謂彼諸緣非作者。故。不從共生者。謂卽由此二種因故。非不自作。他作。因生者。緣望果生。有功能故。又有差別。謂待眾緣生。故。非自作。雖有眾緣。無種子不生。故。非他作。彼俱無作用。故。非其作。種子及眾緣皆有功能。故。非無因生。是故如是說。自種有故。不從他待。眾緣故。非自作。無作用。故。非共生。有功能。故。非無因。若緣起理。非自非

他遣雙句者猶爲甚深況總亡四句是故緣起最極甚深。

甚深中十地論有二一三四句與此第三復次同差別者謂識生差別故內死生差別故外穀生差別故成壞差別故食持差別故愛非愛趣分別差別故清淨差別故威德差別故是差別義識生差別者謂眼色爲緣眼識得生如是等內死生差別者依有情世閒說謂無明等爲緣能生行等外穀生差別者謂種緣芽芽緣莖如是展轉枝葉華果次第得生成壞差別者謂一切有情共業增上力爲緣大地等生故。

食持差別者謂四食爲緣三界有情相續住故愛非愛趣分別差別者謂妙行惡行爲緣往善惡趣故清淨差別者謂順解脫分善爲緣生順決擇分善如是見道等漸次乃至得阿羅漢果等或外從他聞音內如理作意爲緣發生正見次第乃至諸漏永盡威德差別者謂內證爲緣發神通等最勝功德由此差別應隨廣說諸行緣起。

差別八門如大論第十有漏三性等義可知彼以十二支攝二一分一全分。

順逆者謂雜染順逆故清淨順逆故是說緣起順逆。

雜染順逆者或依流轉次第說謂無明緣行如是等順次第說或依安立諦說謂老死苦老死集老死滅老死趣滅行如是等逆次第說清淨順逆者謂無明滅故行滅如是等順次第說由誰無故老死無由誰滅故老死滅如是等逆次第說應如是觀緣生起義一切皆是緣生唯除法界法處一分諸無爲法爲捨執著無因不平等因我故觀察緣生。

順逆中如大論第十三復次釋涅槃經說逆除無明行識觀餘九識業故非未來集因故不說觀或逆觀十菩薩爲太子時觀生老病死乃至識支不

觀餘二如九十三說或觀十一如四十四智等中說以無因故涅槃經說爲生婆羅門除生一法說十一支應彼機故。

雜染順者瑜伽第十有三復次釋九十四中亦說三世順次雜染逆者此中依四諦理說九十三中說世尊在昔菩薩時棄前所得諸世俗智及棄世諸師處菩提座爲欲悲愍利樂有情以爲上首自於諸諦起正觀察爾時爲欲歷觀苦諦由老死支苦諦所攝故於緣起逆歷觀察有三種相等乃至廣說異常大精唯說至愛取二諦周已復觀集諦

乃至識二諦已。及善方便觀滅諦道諦觀道諦至無明。欲令盡無故。此爲世閒見。故安立諦是雜染攝。清淨順者。此依現法。從他聞音斷緣起支次第。如九十三。初染次第生起已。次云。若於現法中。從他聞音。乃至能於二種果性。乃至發生正見道勝前染逆觀已。又於諸諦漸次獲法。乃至無學清淨知見斷無明等。是清淨順次。逆次第者。依斷滅已。重觀而說。此中染順是生死法。染逆是斷生死法。方便清淨。是正斷清淨逆。是重觀已斷。九十三大好。應取彼文。

云何緣。幾是緣。爲何義。故觀緣耶。謂因故等無閒。故所緣故。增上故。是緣義。一切是緣。爲捨執著我爲因法。故觀察緣。

四緣應爲十據。立親疎前後俱時俱緣不緣者。因緣者。謂阿賴耶識及善習氣。與有漏無漏諸法。如其次第。爲因緣故。阿賴耶識復有二種。謂成熟及加行。成熟者是諸生得法。因緣。加行者。是諸方便法。及當來世餘阿賴耶識。因緣。又加行阿賴耶識者。謂於此生中現行轉識等之所熏集。善習氣者。謂順解脫分習氣。由此習氣。用出世閒證等流法。爲緣生。故能

與出世法作因緣。

善習氣等中有三宗釋。三宗護月釋真如爲所緣。從果爲名。今解卽見道前聞緣彼法爲增上緣。勢力增長本有種子後生出世故言由彼所緣生非從果也。

又自性故差別故助伴故等行故增益故障礙故攝受故是因緣相當。知此中以自性等六種因相顯因緣義。謂自性差別兩句建立能作因。餘句如其次第建立俱有相應同類徧行異熟因。

唯識云設名因緣應知假說。此乍同小乘能作因

生等五因是因緣故。下文當知一切因皆能作因。差別卽似小乘故。大乘中假說因緣義。涅槃經明二因。一生因。二了因。生因攝四緣。或三緣業煩惱爲生因。如有望生老死現異熟因。云何有等無閒緣。二了因唯增上緣。望佛法及涅槃爲了因故。應更勘經菩薩地說二因能生方便成實論說三因。謂生因依因習因。生因是報因。依是共有因。習是自分因。大乘是增上緣。或習是因緣現行望種子爲習故。此旣從勝義應不爾。彼宗不說種子故。涅槃經瑜伽此論五因謂生因依因建立因持因養

因并增上緣有六因能作因等十因等果如唯識解。

自性者謂能作因自性依因自性建立能作因故當知一切因皆能作因所攝爲顯差別義故復別建立助伴等因差別者謂能作因差別略有二十種一生能作謂識和合望識由此和合所作本無今有故二住能作謂食望已生及未生有情由此勢力生已相續不斷故三持能作謂大地望有情載令不墮故四照能作謂燈望諸色了闇障故五變壞能作謂火望薪令彼相續變異故六分離能作謂鎌望所斷令連

屬物成二分故七轉變能作謂工巧智等望金銀等物轉彼方分成異相故八信解能作謂煙望火由此比知不現見故九顯了能作謂宗因喻望所成義由此得正決定故十等至能作謂聖道望涅槃由此證破故。

此中能作因攝一切法若親若疎現行及種望果不障或能助力皆能作因解自性中云當知一切因皆能作因所攝又云差別者謂能作因差別略有二十種遂說十位謂善菩提攝受有慧無亂障迴向不怖慳自在名善等及十因故初言七故六

因俱因緣義。唯識第七會云。唯依此二建立因緣。所餘因緣不可得故。

二十能作中。初十能作有辨中邊第一卷障品文。大精應勘之。善菩提攝受。有慧無亂障。迴向不怖。慳自在名善等。

十一隨說能作。謂名想見。由如名字取相執著隨起說故。

隨說因此及諸論不同。如唯識會。然彼云。謂見聞覺知。此中且但有見略也。以瑜伽第五有聞見等後起言說故。此義不然。若爾見應非執著。此初通

說三性因體。

十二觀待能作。謂觀待此故於彼求欲生。如待飢渴追求飲食。由此是彼欲生因故。十三招引能作。謂縣遠緣。如無明望老死。由此異位展轉招當有故。十四生起能作。謂鄰近緣。如無明望行。由此無閒生當有故。十五攝受能作。謂所餘緣。如田水糞等望穀生等。雖自種所生。然增彼力故。十六引發能作。謂隨順緣。如臣事王令正悅豫。由隨順引發故。十七定別能作。謂差別緣。如五趣緣望五趣果。由差別自性招別別果故。十八同事能作。謂和合緣。如根不壞境界現前。

作意正起望所生識以成自所作必待餘能作故。十九相違能作。謂障礙緣。如雹望穀能損彼故。二十不相違能作。謂無障礙。如穀無障與上相違。於此能作因差別中唯說識和合等者。且舉綱要爲諸智者依此一方類思餘故。

觀待此唯無記招引生起唯染。生起與唯識等別。此謂鄰近說生近果名生因。攝受引發此唯無記。定別唯染同事相違不相違唯無記皆略舉一。準餘可知。性故謂能作因言自性差別顯餘因皆能作差別立二十種別差別爲是後五。

助伴者謂諸法共生而生必無缺減如四大種及所造色隨其所應非一切聚定有四大及色等所造若於是處有爾所量此必俱生互不相離。

俱有因云助伴顯非同一果及互爲果唯助伴故。俱有因彼云二門分別一成立義依俱舍必具四義。一生住滅一世一果一性。卽十隨轉然彼師不解極依分別然應思準二約法分齊。小乘可知。今大乘一切皆有爲法共生而生卽是此因。體性寬於小乘然眾多種子生一現卽同得一果立俱有因。若種子等所有現行法爲因名俱有因。非同一

果義。

俱有因論云。謂諸法共有而生。必無缺減。卽一切俱有法相依俱起有力者。皆是此因。如四大種及所造色。隨其所應。釋論仍云。非一切聚定有四大及色等所造。若於是處有爾所量。必俱生互不相離。爲因非餘。故下相應因中云。此但略舉綱要。卽四大望造色相依俱有。故亦是此因。無性攝論第二云。若說五因爲因緣者。卽異門說阿賴耶識俱有因義。說阿賴耶識與諸轉識。此文卽顯本轉二識互爲俱有因。以在因中互爲因緣故。及俱有依

止故。故無性云。若離如是俱有因攝內外種子阿賴耶識。所餘因緣定不可得。此中總說本識七識互爲此因。卽因緣俱有因。今以義詳然有差別。若在果位。七以八爲因。八不以七爲因。非能熏故。若非因緣者。唯以七爲俱有依故。若在因位。前之七識皆以八爲因。八以七識爲因。除六識中異熟果者。非能熏故。前六以七爲因。七不以六爲因。不依六現故。五識以六爲因。不以五爲因。前之五識互不以爲因。於一一識聚中相應心心所更互爲因。其所緣相有二說。一云。八識相緣。本識相分隨所

與七識爲因非七爲八因。七相非六因六相非七因。六相非五因五相非六因。五相相望亦爾。其本識中心王相分與心所相分爲因非心所相分與王相分爲因。不仗託故。餘之七識心王心所相分雖復俱有而互爲因。相仗生故。有義諸相分雖由餘故有餘非俱有因。俱有因者相親依而俱有者仗。諸相分相望皆非種故。與見分旣非親合非俱有因。見自證等其現亦非。非異體故。於相分中大種與造色爲因。造色與大種同聚者爲因。必無闕減互不相離說爲因故。大種望大種造色望造色。

隨所應有皆得爲因。不同餘宗不闕十隨轉及更爲果立俱有因。故其種子如異性異熟因。種名言種子爲因。名言與業種非因。大種與造色爲因。非造色與大種爲因。不託生故。眼種與眼識種爲因。非種識與眼爲因。餘相仗者皆如是。若託爲因。唯同地因。若俱者通他地。此中依因緣爲俱有因。唯本識等增上緣。如此中次相應因。中唯心心所同行一境爲因。此論依現行相望爲論。無性云相應因者。心與心所更互相待。受用境界有自功能。猶如商旅非離功能。阿賴耶識能依種起。卽與相應。

法爲因是因緣種。此通因緣。非因緣。同類因界。唯自界色。唯色蘊。四唯四蘊。善不善無覆。唯自性。其有覆身邊見等。亦與不善煩惱爲因。由習增故。其不善煩惱不現增。俱生身邊見故。非因。或與等非因。不增勝故。異性非因。不相似故。

等行者。謂諸法共有等行所緣。必無缺減。如心心所前約助伴決定建立。俱有因中。唯說大種及所造色者。此但略標綱目。以心心所互不相離性決定故。亦助伴攝。若爾不應別立相應因。諸心心所亦共有因所攝故。雖爾然義有異。謂諸法共有等行所緣互不

相離。此等行故。立相應因。非唯共有義。如心心所。

相應因者。顯非辨體。但行同境。亦顯種因更皆爲因。

六釋釋名。相應因等行所緣名。等行中同一所緣不同行相等。應如唯識二解。本質影像。然唯現行爲因。乃至增上緣。若種子與相應心等法爲因。名因緣。

增益者。謂前際修習善不善無記法故。能令後際善等諸法展轉增勝。後後生起。前際修習者。謂先所數習現行義。後際展轉增勝。後後生起者。謂由彼長養

諸種子故於未來世卽彼種類增勝而生。如是諸法能爲相似增長因故立同類因。

同類因言增益者顯與等勝爲因非劣故。

同類因五蘊互相望皆得謂無表色等。或準小乘善不善五蘊皆得無記五蘊一總二別總中如俱舍等有四說然準迦延四大於心心法所緣緣增上不言有因故第四說色非四因好或解色不爲四因四爲色因第二師好乃至十時皆如理知。四無記相望應知。然準此文唯與勝爲因不與等劣爲因唯言增勝故。或唯同小乘與等爲因論言能

爲相似因故。若現行相望皆增上緣。若種望種自類望現行自類皆因緣。

障礙者謂隨所數習諸煩惱故隨所有惑皆得相續增長堅固乃令相續遠避涅槃。此徧行因非唯令相似煩惱增長。所以者何。若有隨習貪等煩惱皆令瞋等一切煩惱相續增長堅固。由此深重縛故障解脫得。是故建立徧行因。

徧行因言障礙者非唯徧行煩惱但障聖道爲此攝故。

徧行因中彼師立苦集下各十煩惱爲體增益五

門惑故。此論云由貪等嗔等增故。今言四諦下皆是有一煩惱通迷四諦見四諦斷能爲因故。如迷諦相修道不能不通迷故。無力不能增長諸惑。若徧緣行在五門名徧行因。卽增上緣。唯現行望現行故。此同小乘。今大乘若貪與貪爲徧行因。何等亦是所增煩惱通因緣。增上緣攝自類他類二各別故。若種子與現徧行法爲因。卽唯因緣。

攝受者謂不善及善有漏法能攝受自體故。卽是異熟因。由此能引攝當來一向不相似無覆無記自體所攝異熟果故。卽攝受義建立異熟因。善有漏言爲

簡無漏。由違生死故。不能感異熟果。

異熟因不同餘宗。唯據內自體有異熟因也。

異熟因彼以二門一止諸部二品數。感果不同。如可信弟子部三善根中除無癡但餘二善。無心定體是善報。亦能得三不善根前二唯欲界癡通三界。感果亦爾。正量部欲界身起上二界業受二界報。以無漏業得無漏報。譬喻師離思無報因。離受無報果。復有說報熟因亡未熟因在。大眾部唯心所成報非餘法。薩婆多三業皆報因。一業感一果。不得多身等。彼云今大乘四蘊爲報因。五蘊爲

果。然無表既是色蘊。五蘊今爲因。品數者。瑜伽五十九。此論第七云。上中下業果。乃至如瑜伽等問答分別。如五十九六十大論第九等分別。今大乘唯增上緣。應問七支三業何者。感總別。現俱一思同感一果耶。然顯揚論不破異熟因。不壞因果故。如大乘餘五因皆增上緣攝。今依攝論第二卷。相應與異熟徧行。卽阿賴耶識。似解是因緣。是異熟因。因緣所攝。今解。但許彼因。卽第八識。非許異熟因。亦因緣攝。如上所說。亦有因緣義。唯除異熟因。從多分故。認彼也。以異熟因。卽本識種子故。

大乘阿毗達磨雜集論述記卷第十四

